

Pelajar UniMAP Dipilih Berucap Pada Majlis Makan Malam Persidangan Parlimen Mahasiswa



Pelajar tahun dua Pusat Pengajian Kejuruteraan Pembuatan Universiti Malaysia Perlis (UniMAP), Muhammad Khairul Rezwan Abdul Rahman, diberi penghormatan menyampaikan ucapan aluan mewakili perwakilan mahasiswa pada Majlis Makan Malam Persidangan Parlimen Mahasiswa Sesi 2015.

Lebih membanggakan ucapan tersebut dibuat di hadapan Timbalan Perdana Menteri Malaysia, Tan Sri Muhyiddin Yassin yang juga Menteri Pendidikan Malaysia dan ratusan tetamu kehormat lainnya termasuk mantan Ahli-Ahli Parlimen terkenal di Malaysia.

Muhammad Khairul Rezwan dalam ucapannya menyambut baik usaha dan inisiatif kerajaan dalam penganjuran parlimen mahasiswa yang secara tidak langsung memberi pendedahan kepada golongan mahasiswa tentang etika dan peraturan yang harus dipatuhi sewaktu persidangan Parlimen. Menurut beliau, persidangan tersebut juga menjadi wahana terbaik buat para mahasiswa melontarkan serta mempertahankan idea masing-masing berdasarkan isu-isu yang diutarakan. Ini secara tidak langsung dapat mengukuhkan kepimpinan diri di kalangan mahasiswa yang merupakan tonggak utama kepimpinan negara di masa hadapan dan pada masa sama meningkatkan tahap keyakinan diri mahasiswa.

Seramai 200 pelajar dari 19 buah Institusi Pengajian Tinggi Awam (IPTA) menyertai persidangan dua hari di bangunan Parlimen yang berakhir semalam. Ia dianjurkan Majlis Bekas Wakil Rakyat Malaysia (Mubarak) bersama Universiti Islam Antarabangsa Malaysia (UIAM) dan Kementerian Pendidikan.

